



10. marts 2009

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

**Aasaanerani nalunaaquttap aalajangersarneqarnera pillugu Namminersornerullutik Oqartussat Nalunaarutaat nr. 19 – 5. oktober 2006-imeersoq pillugu Naalakkersuisunut apeqquteqaat**

(Inatsisartunut ilaasortaq Palle Christiansen, Demokraatit)

**Tunngavigisaq:**

”Aasaanerani nalunaaquttap aalajangersarneqarnera pillugu Namminersornerullutik Oqartussat Nalunaarutaat nr. 19 – 5. oktober 2006-imeersoq” atuuttoq iluatsippallaanngitsutut oqaatigineqartariaqarpoq.

Nalunaarut qallunaat aasaanerani nalunaaquttap aalajangersarneqarnera aallaavigalugu pilersitaavoq tassalu imaappoq marts-ip qaammataani sapaammi kingullermi nal. 02.00 aasaanerani nalunaaquttamat nikisitsisoqartarluni. Maani Kalaallit-nunaanni Danmarkip nikisitsinera ilutigalugu nikisitsisoqartassasoq aalajangiunneqarnikuuvoq, tassa Kalaallit-nunaata kitaata nalunaaquttap akunnerinik sisamanik nikinganera tamatumani ilaatereerlugu.

Ajoraluartumilli nalunaarutip tamatuma taamatut isikkoqarnerata kinguneraa martsimi arfininngornermi kingullermi nal. 22.00 nalunaaqutap aasaaneranut nikisinneqartarnera.

Matumani ajornartorsiut tassaavoq qaammammi arfiningnorneq kingulleq ilaatigooriarluni qaammammi sapaammit kingullermit kingulliulluni nalaarneqarsinnaammat (tamanna kingullermik pivoq 2007-imi tullianillu pisussaalluni 2012-mi). Tamannalu pigaangat Danmark-imi aammalumi nunarsuup sinnerata ilaani nalunaaqutaq aasaaneranut nikisinneqartarpoq Kalaallit-nunaanni aasaaneranut nikisitsinissaq ullunik arfinilinnik sioqqullugu, tassami nalunaarutip nalinnaanissamik siunertarigalua taamaalilluni atorunnaartarpoq. Ajornartorsiut tamanna atuuteqqilertarpoq, nalunaaqutaq nalinginnaasumut inissinneqaqqikkaangat, tassalu imaappoq 2009-mi nalunaaqutaq nalinginnaasumut inisseqqilerutsigu ”allat tamarmik” Kalaallit-nunaannit sapaatip akunnerani siulliullutik aaqqiisimariissammata.

Ajornartorsiut alla tassa Microsoft-ip qarasaasiatigut atortut ullumikkut annertoorujussuarmik atorneqartut qaqugorpiatq nalunaaquttamik nikisitsinissamut tamanut atuuttumik pisortatigoortumik aalajangersagaateqanngimmat, taamaammallu qarasaasiatigut atortut Amerikap nunataata kangiata sineriaata qassinngornera malittaralugu nikisinneqatarmata, tamatumalu kingunerisaanik Europamut naleqqiullugu nikisitsineririt ullormik nikingallutik. Ajornartorsiut taanna IT-nik atortuuteqartut amerlanersaasa nammineerlutik isumagisarpaat, tamannalu immikkut sulineq pisariaqanngittariaqaraluarpoq.



Demokraatiniit isumaqarpugut nalunaarutip pineqartup allanngortinneqarnissaanut atatillugu pilersaaruteqarnitsinni periarfisaq iluatsillugu qallunaat nalunaaqutaata aasaanerani nikisinneqartarneranut immitsinnut pituttoqqajunnaarluta nunarsuarmioqataansinnini nunani tamani pissutsinut ilannguttariaqartugut.

Soorlu assersuutigalugu Nam. Oqartussat nalunaarutaat imatut allannguiffigineqarsinnaavoq:

§ 2. Aasaanerani nalunaaqutaq Kalaallit-nunaanni nalunaaquttap nalinginnaasup qassinngornera tunngavigalugu marts-imi sapaammi kingullermi nal. 01.00 GMT, tassa Kalaallit-nunatsinni nalunaaqutaq 23.00-nngortillugu.

§ 3. Aasaanerani nalunaaqutaq atorunnaarsinneqartassaaq Kalaallit-nunaanni nalunaaquttap nalinginnaasup qassinngornera tunngavigalugu oktoberimi sapaammi kingullermi nal. 01.00 GMT, tassa Kalaallit-nunatsinni nalunaaqutaq 22.00-nngortillugu.

Naalakkersuisut isumaqannginnerlutik – tassa Demokraatit isumaqatigalugit – nalunaarutip atuuttup qulaani siunnersuutigineqartutut allannguiffigineqarnissaa isumassarsiatsialaasoq imaluunniit Naalakkersuisut nalunaarutip atuuttup naleqqupaallanngitsumik ilusilikkap pitsaanerusunngortinnissaa siunertaralugu allanik siunnersuuteqassamaarnerlutik?

Naalakkersuisut qinnuvigineqassapput apeqquteqaatit ullut suliffiusut qulit qaangiutsinnagit akissuteqarfigeqqullugit.